

李白诗选

唐·李白

目录

001	下江陵 朝辞白帝彩云间.....	01
002	子夜四时歌 春歌 秦地罗敷女	01
003	子夜四时歌 夏歌 镜湖三百里	02
004	子夜四时歌 秋歌 长安一片月	02
005	子夜四时歌 冬歌 明朝驿使发	03
006	月下独酌 花间一壶酒.....	03
007	玉阶怨 玉阶生白露.....	04
008	行路难三首之一 金樽清酒斗十千.....	04
009	行路难三首之二 大道如青天.....	05
010	行路难三首之三 有耳莫洗颍川水.....	06
011	宣州谢 楼饯别校书叔云 弃我去者.....	07
012	把酒问月 故人贾淳令余问之 青天有月来几时	07
013	夜泊牛渚怀古 牛渚西江夜.....	08
014	夜思 床前明月光.....	09
015	金陵酒肆留别 风吹柳花满店香.....	09
016	长干行 妾发初覆额.....	10
017	长相思二首之一 长相思.....	11
018	长相思二首之二 日色已尽花含烟.....	11
019	怨情 美人卷珠帘.....	12
020	春思 燕草如碧丝.....	12
021	送友人 青山横北郭	13

022	送孟浩然之广陵 故人西辞黄鹤楼.....	13
023	将进酒 君不见.....	14
024	清平调三首之一 云想衣裳花想容.....	15
025	清平调三首之二 一枝红艳露凝香.....	15
026	清平调三首之三 名花倾国两相欢.....	16
027	渡荆门送别 渡远荆门外	16
028	蜀道难 噫吁戏	17
029	下终南山过斛斯山人宿置酒 暮从碧山下.....	18
030	梦游天姥吟留别 海客谈瀛洲.....	19
031	庐山谣寄卢侍御虚舟 我本楚狂人	20
032	赠孟浩然 吾爱孟夫子.....	21
033	关山月 明月出天山.....	22
034	听蜀僧浚弹琴 蜀僧抱绿绮	22
035	送裴十八图南归嵩山二首其二 君思颖水绿	23
036	山中问答 问余何意栖碧山	23
037	客中作 兰陵美酒郁金香	23
038	山中与幽人对酌 两人对酌山花开.....	24
039	青溪半夜闻笛 羌笛梅花引.....	24
040	陌上赠美人 骏马骄行踏落花	24
041	赠汪伦 李白乘舟将欲行	25
042	送贺宾客归越 镜湖流水漾清波	25
043	送陆判官往琵琶峡 水国秋风夜	26
044	流夜郎赠辛判官 昔在长安醉花柳.....	26
045	黄鹤楼送孟浩然之广陵 峨眉山月半轮秋	27
046	邕中赠王大劝入高凤石门山幽居 一身竟无托.....	27
047	思边 去年何时君别妾.....	28
048	忆东山 不向东山久.....	28

049	自遣 对酒不觉瞑	29
050	巴女词 巴水急如箭	29
051	春夜洛城闻笛 谁家玉笛暗飞声	29
052	峨眉山月歌 峨眉山月半轮秋	30
053	东鲁门泛舟其一 日落沙明天倒开	30
054	东鲁门泛舟其二 水作青龙盘石堤	31
055	登金陵凤凰台 凤凰台上凤凰游	31
056	闻王昌龄左迁龙标遥有此寄 杨花落尽子规啼	32
057	送友人 青山横北郭	32
058	横江词六首 人道横江好	32
059	哭宣城善酿纪叟 纪叟黄泉里	34
060	折荷有赠 涉江玩秋水	34

001 下江陵

朝辞白帝彩云间，千里江陵一日还。
两岸猿声啼不住，轻舟已过万重山。

002 子夜四时歌

春歌

秦地罗敷女，采桑绿水边。
素手青条上，红妆白日鲜。
蚕饥妾欲去，五马莫留连。

003 子夜四时歌

夏歌

镜湖三百里，菡萏发荷花。
五月西施采，人看隘若耶。
回舟不待月，归去越王家。

004 子夜四时歌

秋歌

长安一片月，万户捣衣声。
秋风吹不尽，总是玉关情。
何日平胡虏，良人罢远征。

005 子夜四时歌

冬歌

明朝驿使发，一夜絮征袍。
素手抽针冷，那堪把剪刀。
裁缝寄远道，几日到临洮。

006 月下独酌

花间一壶酒，独酌无相亲。
举杯邀明月，对影成三人。
月既不解饮，影徒随我身。
暂伴月将影，行乐须及春。

我歌月徘徊，我舞影零乱。

醒时同交欢，醉後各分散。

永结无情游，相期邈云汉。

007 玉阶怨

玉阶生白露，夜久侵罗袜。

却下水晶帘，玲珑望秋月。

008 行路难

之一

金樽清酒斗十千，玉盘珍羞值万钱。

停杯投箸不能食，拔剑四顾心茫然。

欲渡黄河冰塞川，将登太行雪暗天。
闲来垂钓碧溪上，忽复乘舟梦日边。
行路难！行路难！多歧路，今安在？
长风破浪会有时，直挂云帆济沧海。

009 行路难

之二

大道如青天，我独不得出。
羞逐长安社中儿，赤鸡白狗赌梨栗。
弹剑作歌奏苦声，曳裾王门不称情。
淮阴市井笑韩信，汉朝公卿忌贾生。
君不见昔时燕家重郭隗，拥彗折节无嫌猜；
剧辛乐毅感恩分，输肝剖胆效英才。

昭王白骨萦蔓草，谁人更扫黄金台？行路难！归去来！

010 行路难

三

有耳莫洗颍川水，有口莫食首阳蕨。

含光混世贵无名，何用孤高比云月。

吾观自古贤达人，功成不退皆殒身。

子胥既弃吴江上，屈原终投湘水滨。

陆机雄才岂自保，李斯税驾苦不早。

华亭鹤唳讵可闻，上蔡苍鹰何足道。

君不见吴中张翰称达生，秋风忽忆江东行。

且乐生前一杯酒，何须身後千载名。

011 宣州谢朓楼饯别校书叔云

弃我去者，昨日之日不可留；

乱我心者，今日之日多烦忧。

长风万里送秋雁，对此可以酣高楼。

蓬莱文章建安骨，中间小谢又清发。

俱怀逸兴壮思飞，欲上青天览明月。

抽刀断水水更流，举杯销愁愁更愁。

人生在世不称意，明朝散发弄扁舟。

012 把酒问月

故人贾淳令余问之

青天有月来几时？我今停酒一问之。

人攀明月不可得，月影却与人相随。
皎如飞镜临丹阙，绿烟来尽清辉发。
但见宵从海上来，宁知晓向云间没。
白兔捣药秋复春，嫦娥孤栖与谁邻。
今人不见古时月，今月曾经照古人。
古人今人若流水，共看明月皆如此。
唯愿当歌对酒时，月光常照金樽里。

013 夜泊牛渚怀古

牛渚西江夜，青天无片云。
登舟望秋月，空忆谢将军。
余亦能高咏，斯人不可闻。
明朝挂帆席，枫叶落纷纷。

014 夜思

床前明月光，疑是地上霜。

举头望明月，低头思故乡。

015 金陵酒肆留别

风吹柳花满店香，吴姬压酒唤客尝。

金陵子弟来相送，欲行不行各尽觞。

请君试问东流水，别意与之谁短长。

016 长干行

妾发初覆额，折花门前剧。郎骑竹马来，绕床弄青梅。
同居长干里，两小无嫌猜。十四为君妇，羞颜未尝开。
低头向暗壁，千唤不一回。十五始展眉，愿同尘与灰。
常存抱柱信，岂上望夫台。十六君远行，瞿塘滟滪堆。
五月不可触，猿鸣天上哀。门前迟行迹，一一生绿苔。
苔深不能扫，落叶秋风早。八月蝴蝶来，双飞西园草。
感此伤妾心，坐愁红颜老。早晚下三巴，预将书报家。
相迎不道远，直至长风沙。

017 长相思

之一

长相思，在长安。络纬秋啼金井阑，微霜凄凄簟色寒。

孤灯不明思欲绝，卷帷望月空长叹，美人如花隔云端。

上有青冥之高天，下有绿水之波澜；

天长路远魂飞苦，梦魂不到关山难。

长相思，摧心肝！

018 长相思

之二

日色已尽花含烟，月明欲素愁不眠。

赵瑟初停凤凰柱，蜀琴欲奏鸳鸯弦。

此曲有意无人传，愿随春风寄燕然。
忆君迢迢隔青天，昔日横波目，今成流泪泉，
不信妾肠断，归来看取明镜前。

019 怨情

美人卷珠帘，深坐蹙蛾眉。
但见泪痕湿，不知心恨谁。

020 春思

燕草如碧丝，秦桑低绿枝。
当君怀归日，是妾断肠时。
春风不相识，何事入罗帏。

021 送友人

青山横北郭，白水绕东城。

此地一为别，孤蓬万里征。

浮云游子意，落日故人情。

挥手自兹去，萧萧班马鸣。

022 送孟浩然之广陵

故人西辞黄鹤楼，烟花三月下扬州。

孤帆远影碧空尽，惟见长江天际流。

023 将进酒

君不见黄河之水天上来，奔流到海不复回；

君不见高堂明镜悲白发，朝如青丝暮成雪。

人生得意须尽欢，莫使金樽空对月。

天生我材必有用，千金散尽还复来。

烹羊宰牛且为乐，会须一饮三百杯。

岑夫子，丹丘生，将进酒，君莫停。

与君歌一曲，请君为我侧耳听。

钟鼓馔玉不足贵，但愿长醉不愿醒。

古来圣贤皆寂寞，惟有饮者留其名。

陈王昔时宴平乐，斗酒十千恣欢谑。

主人何为言少钱，径须沽取对君酌。

五花马，千金裘，呼儿将出换美酒，与尔同消万古愁。

024 清平调

之一

云想衣裳花想容，春风拂槛露华浓。

若非群玉山头见，会向瑶台月下逢。

025 清平调

之二

一枝红艳露凝香，云雨巫山枉断肠。

借问汉宫谁得似，可怜飞燕倚新妆。

026 清平调

之三

名花倾国两相欢，常得君王带笑看。

解释春风无限恨，沉香亭北倚阑干。

027 渡荆门送别

渡远荆门外，来从楚国游。

山随平野尽，江入大荒流。

月下飞天镜，云生结海楼。

仍怜故乡水，万里送行舟。

028 蜀道难

噫吁戏，危乎高哉！蜀道之难，难于上青天！

蚕丛及鱼凫，开国何茫然。
尔来四万八千岁，始与秦塞通人烟。

西当太白有鸟道，可以横绝峨眉巅。
地崩山摧壮士死，然后天梯石栈方钩连。

上有六龙回日之高标，下有冲波逆折之回川。
黄鹤之飞尚不得过，猿猱欲度愁攀援。

青泥何盘盘，百步九折萦岩峦。
扪参历井仰胁息，以手抚膺坐长叹。

问君西游何时还？畏途巉岩不可攀。
但见悲鸟号古木，雄飞雌从绕林间。

又闻子规啼夜月，愁空山。蜀道之难，
难于上青天，使人听此凋朱颜！

连峰去天不盈尺，枯松倒挂倚绝壁。

飞湍瀑流争喧聒，砢崖转石万壑雷。

其险也如此，嗟尔远道之人，胡为乎来哉！

剑阁峥嵘而崔嵬，一夫当关，万夫莫开。

所守或匪亲，化为狼与豺。
朝避猛虎，夕避长蛇，磨牙吮血，杀人如麻。

锦城虽云乐，不如早还家。
蜀道之难，难于上青天，侧身西望常咨嗟！

029 下终南山过斛斯山人宿置酒

暮从碧山下，山月随人归。
却顾所来径，苍苍横翠微。

相携及田家，童稚开荆扉。
绿竹入幽径，青萝拂行衣。

欢言得所憩，美酒聊共挥。
长歌吟松风，曲尽河星稀。

我醉君复乐，陶然共忘机。

030 梦游天姥吟留别

海客谈瀛洲，烟涛微茫信难求；
越人语天姥，云霓明灭或可睹。

天姥连天向天横，势拔五岳掩赤城。
天台四万八千丈，对此欲倒东南倾。

我欲因之梦吴越，一夜飞渡镜湖月。
湖月照我影，送我至剡溪。

谢公宿处今尚在，渌水荡漾清猿啼。
脚著谢公屐，身登青云梯。

半壁见海日，空中闻天鸡。
千岩万壑路不定，迷花倚石忽已暝。

熊咆龙吟殷岩泉，栗深林兮惊层巅。
云青青兮欲雨，水澹澹兮生烟。

列缺霹雳，邱峦崩摧。洞天石扇，訇然中开。

青冥浩荡不见底，日月照耀金银台。
霓为衣兮风为马，云之君兮纷纷而来下。

虎鼓瑟兮鸾回车，仙之人兮列如麻。
忽魂悸以魄动，恍惊起而长嗟。

惟觉时之枕席，失向来之烟霞。
世间行乐亦如此，古来万事东流水。

别君去兮何时还？且放白鹿青崖间，须行即骑访名山。

安能摧眉折腰事权贵，使我不得开心颜！

031 庐山谣寄卢侍御虚舟

我本楚狂人，凤歌笑孔丘。手持绿玉杖，朝别黄鹤楼。

五岳寻仙不辞远，一生好入名山游。

庐山秀出南斗傍，屏风九叠云锦张，影落明湖青黛光。

金阙前开二峰长，银河倒挂三石梁。
香炉瀑布遥相望，回崖沓障凌苍苍。

翠影红霞映朝日，鸟飞不到吴天长。
登高壮观天地间，大江茫茫去不还。

黄云万里动风色，白波九道流雪山。
好为《庐山谣》，兴因庐山发。

闲窥石镜清我心，谢公行处苍苔没。
早服还丹无世情，琴心三叠道初成。

遥见仙人彩云里，手把芙蓉朝玉京。
先期汗漫九垓上，愿接卢敖游太清。

032 赠孟浩然

吾爱孟夫子，风流天下闻。红颜弃轩冕，白首卧松云。

醉月频中圣，花不事君。高山安可仰，徒此挹清芬。

033 关山月

明月出天山，苍茫云海间。长风几万里，吹度玉门关。
汉下白登道，胡窥青海湾。由来征战地，不见有人还。
戍客望边色，思归多苦颜。高楼当此夜，叹息未应闲。

034 听蜀僧浚弹琴

蜀僧抱绿绮，西下峨眉峰。为我一挥手，如听万壑松。
客心洗流水，馀响入霜钟。不觉碧山暮，秋云暗几重。

035 送裴十八图南归嵩山

其二

君思颖水绿，忽复归嵩岑。归时莫洗耳，为我洗其心。
洗心得真情，洗耳徒买名。谢公终一起，相与济苍生。

036 山中问答

问余何意栖碧山，笑而不答心自闲。
桃花流水杳然去，别有天地非人间。

037 客中作

兰陵美酒郁金香，玉碗盛来琥珀光。

但使主人能醉客，不知何处是他乡。

038 山中与幽人对酌

两人对酌山花开，一杯一杯复一杯。

我醉欲眠卿且去，明朝有意抱琴来。

039 青溪半夜闻笛

羌笛梅花引，吴溪陇水情。

寒山秋浦月，肠断玉关声。

040 陌上赠美人

骏马骄行踏落花，垂鞭直拂五云车。

美人一笑褰珠箔，遥指红楼是妾家。

041 赠汪伦

李白乘舟将欲行，忽闻岸上踏歌声。

桃花潭水深千尺，不及汪伦送我情。

042 送贺宾客归越

镜湖流水漾清波，狂客归舟逸兴多。

山阴道士如相见，应写黄庭换白鹅。

043 送陆判官往琵琶峡

水国秋风夜，殊非远别时。

长安如梦里，何日是归期。

044 流夜郎赠辛判官

昔在长安醉花柳，五侯七贵同杯酒。
气岸遥临豪士前，风流肯落他人後。

夫子红颜我少年，章台走马著金鞭。
文章献纳麒麟殿，歌舞淹留玳瑁筵。

045 黄鹤楼送孟浩然之广陵

峨眉山月半轮秋，影入平羌江水流。
夜发青溪向三峡，思君不见下渝州。

046 邕中赠王大劝入高凤石门山幽居

一身竟无托，远与孤蓬征。千里失所依，复将落叶并。
中途偶良朋，问我将何行。欲献济时策，此心谁见明。
君王制六合，海塞无交兵。壮士伏草间，沉忧乱纵横。
飘飘不得意，昨发南都城。紫燕坊上嘶，青萍匣中鸣。
投躯寄天下，长啸寻豪英。耻学琅琊人，龙蟠事躬耕。
富贵吾自取，建功及春芳。我愿执手书，尔方达我情。

临别意难尽，各希存令名。

047 思边

去年何时君别妾？南园绿草飞蝴蝶。

今岁何时妾忆君？西山白云暗秦云。

玉关此去三千里，欲寄音书那可闻？

048 忆东山

不向东山久，蔷薇几度花。

白云还自散，明月归谁家。

东山：在今浙江上虞县西南。山上有蔷薇洞，又有晋太傅 谢安所建白云堂、明月堂旧址。

049 自遣

对酒不觉暝，落花盈我衣。
醉起步溪月，鸟还人亦稀。

050 巴女词

巴水急如箭，巴船去欲飞。
十月三千里，郎行几岁归。

051 春夜洛城闻笛

谁家玉笛暗飞声，散入春风满洛城。

此夜曲中闻折柳，何人不起故园情。

052 峨眉山月歌

峨眉山月半轮秋，影入平羌江水流。

夜发清溪向三峡，思君不见下渝州。

平羌江 即青衣江、源出四川芦山县西北。

清溪 即青溪驿

渝州 今四川重庆一带地方。

053 东鲁门泛舟

其一

日落沙明天倒开，波摇石动水萦回。

轻舟泛月寻溪转，疑是山阴雪后来。

山阴 今浙江绍兴

054 东鲁门泛舟

其二

水作青龙盘石堤，桃花夹岸卢门西。
若教月下乘舟去，何啻风流到剡溪。

055 登金陵凤凰台

凤凰台上凤凰游，凤去楼空江自流。
吴宫花草埋幽径，晋代衣冠成古邱。
三山半落青天外，二水中分白鹭洲。
总为浮云能蔽日，长安不见使人愁。

056 闻王昌龄左迁龙标遥有此寄

杨花落尽子规啼，闻道龙标过五溪。

我寄愁心与明月，随君直到夜郎西。

057 送友人

青山横北郭，白水绕东城。此地一为别，孤蓬万里征。

浮云游子意，落日故人情。挥手自兹去，萧萧班马鸣。

058 横江词

其一

人道横江好，侬道横江恶。

一风三日吹倒山，白浪高于瓦官阁。

其二

海朝南去过寻阳，牛渚由来险马当。

横江欲渡风波恶，一水牵愁万里长。

其三

横江西望阻西秦，汉水东连扬子津。

白浪如山那可渡，狂风愁杀峭帆人。

其四

海神东过恶风回，浪打天门石壁开。

浙江八月何如此，涛似连山喷雪来。

其五

横江馆前津吏迎，向余东指海云生。

郎今欲渡缘何事，如此风波不可行。

其六

日晕天风雾不开，海鲸东蹙百川回。

惊波一起三山动，公无渡河归去来。

059 哭宣城善酿纪叟

纪叟黄泉里，还应酿老春。

夜台无李白，沽酒与何人。

060 折荷有赠

涉江玩秋水，爱此红渠鲜。

攀荷弄其珠，荡漾不成圆。

佳人彩云里，欲赠隔远天。

相见无因见，怅忘凉风前。